

Regional News Unit AIR Aizawl
Friday, March 07, 2025
Time - 7:30 -7:40Hrs

REGIONAL NEWS BULLETIN

HEADLINES (MORNING)

- Mizote Kut pui ber leh hlut ber Chapchar Kut chu vawiin hian Aizawl Sipai Lammual-ah uar taka lawm a ni ang.
- Mizoram Legislative Assembly nimina thukhawm chuan The Mizoram (Village Councils) Bill, 2025 chu lungrual takin a pass.
- Computer khawl pawimawh Graphic Processing Unit (GPU) chu ramchhungah ngei kum 3 atanga kum 4 chhungin siam a ni dawn.
- International Women's Day chu naktukah lawm a ni dawn.

<><><>

CHAPCHAR KUT

Mizote Kut pui ber, leh hlut ber Chapchar Kut chu vawiin hian Aizawl Sipai Lammual-a lawm a ni anga, Chief Minister Pu Lalduhawman a hmanpui ang.

Nimin atang khan Chapchar Kut hi lammualah hian lawm a ni a, nimin khan Environment, Forest and Climate Change Minister Pu Lalthansanga'n a hawng a,

Pu Lalthansanga chuan Kut thupui "Hawihhawmna" chu Mizo nuna bet tlat a ni a ti a, Zonun Ze Mawi chu Zofate phuar khawmtu ani tih sawiin Zofa hmun hrang hranga cheng te vawng nung tlat turin a duh thu a sawi.

Byte : Chapchar Kut

Chapchar Kut chungchanga kan corr report lo ngaithla ang.

Mizote Kutpui ber Chapchar Kut Ni 2 awh chu vawiin hian Mizoram hmun hrang hrang lawm chhunzawm a ni dawn a, a lawmna pui ber Aizawl Sipai Lammual-ah Chief Minister Pu Lalduhoma'n a hmanpui dawn a, zai, lam leh intihhlimna hrang hrang nen he hun hi hman a ni ang.

"Zonun Zemawi Hawihhawmna" tih thupui hmanga Ni 2 awh Chapchar Kut hi Mizoram hmun hrang hrang leh Zoram pawna zofaten an lawm dawn a, Chapchar Kut hi pu pute hunlai atanga ropui thei ang bera lawm thin niin Mizo Hnam lam leh zai te hnen hlim taka hman thin a ni a, hmanlai atanga pi pute tih dan thin chhawm nung zelin Mizo infiamna, zai leh lam te leh tihdan phung hrang hrang te he kut pual hian chawi lar thin a ni.

C. Lalmunsangi / Akashvani / Aizawl

Pu Lalthansanga chuan Chapchar Kut an hmanna hmun Lammual chu Assam Rifles ten kum engemaw zah anlo luah tawh chu Assam Rifles hmel hmuh tur a awm manglo in a awm tawh a ti a, hun reilote ah Mizoram sawrkar kutah a awm dawn tih sawiin Assam Rifles hmun chu uluk lehzuala neitu thinlung pu a hmang turin mipuite a duh tih a sawi.

<><><>

CM

Chief Minister Pu Lalduhoma'n kawng siam danah kalphung thar hman a ni tawh a ti a, kawngpui chu rigid pavement veka siam a nih dawn avangin a tlo bik dawn a ti.

Nimina Assembly thutkhawmah he thu hi sawiin House Leader leh Chief Minister Pu Lalduhoma chuan kawng chu concrete-in paver khawl kal theihna zawng zawng chu siam vek a ni tawh a ti a, hetihlai hian paver khawl kal theih lohna chu tunhmaa an lo siam thin dan anga an la siam chhonzawm a ngai a ti a, rigid pavement chu hautak deuh dawn mahse a tlo dawn hle dawn a ti a, tun dinhmuna harsatna an tawh mek chu kawng siam tura mimal ram lak ngai chu a ni tih sawiin hemi chingfel tur hian session kal mekah hian Minister in bill putlul a tum mek tih a sawi bawk.

Byte: Chief Minister Pu Lalduhoma

Hetihlai hian PWD Minister Pu Vanlalhlana chuan vawiina Assembly thutkhawmah Congress MLA Pu Ngunlianchunga zawhna chhangin, ZPM kaihhrui sorkar chuan kum 2024-2025 chhungin Mizoram kawngpui siamthat nan cheng vbc, 17, nuai 69, sing 1, sang 7 a dah a ti a, kawngpui siamthat nan an pawisa dah cheng vbc 17, nuai 69, sing 1, sang 7 chu hman ral vek a ni tawh tih a sawi a. Kawngpui enkawl nan hian PWD chuan kilometre 1 zelah cheng sing 4, sang 9 leh 300 a ruahman a, hetihlai hian kawng chhiat leh that dan a zirin kawng kilometre khat zel a pawisa hman chu a danglam hle tih a sawi bawk.

<><><>

VC BILL

Mizoram Legislative Assembly nimina thukhawm chuan The Mizoram (Village Councils) Bill, 2025 chu lungrual takin a pass.

Bill puluttu Minister Pu C.Lalsawivunga chuan Dan thar danglam bikna tur chu VC member zingah sorkar sum tichingpen an awm chuan VC tawp thiat lova a tisualtu member hrem a ni dawn a ti a, he bill ah hian dan hluia a tha lai leh la hman chhonzawm theih zawng zawngte chu sengluh a ni a, village council din, thiah te, a hun chung te, hmeichhe te tana seat hauhsak, village council executive body, an rorel dan tur te chu a ngai ang leh tlema tidanglam hretin dan tharah hian sengluh vek a ni tih a sawi a, hei bakah hian village council thuneihna tam zawk pek rawt a ni a, Chiang leh felfai zawkin an thuneihna te pawh ziah a ni a, Village council inpek theih dan pawh mumal zawka siam a ni a, India danpuia panchayat mawhphurhna zawng zawng sengluh a ni a, United Nations Sustainable goal 17 te tihhlawhtlinna tur pawh he dan tharah hian dah tel a ni bawk.

Minister chuan dan hmasaa Pawi Lakher autonomous district area tiam lovin tih thin chu he dan tharah hian Autonomous District Council area leh Municipal Area tiam lovin ti-a ziah a ni tawh tih a sawi a, village council a member awm thei zat chu dan hmasaah chhungkaw awm zata teh a nih laiin dan tharah chuan mihring cheng zata teh a ni tawh dawn a, mihring 500 chennaah member 3 an awm a, 500 aia tamnaah member 5 an awm dawn a, 1000 atanga 2000 inkarah member 7 an awm ang a, 2000 chunglamah member 9 an awm ang, VC term chu kum 5 a ni dawn a, sorkarin tul bik thilah chuan thla 12 thlengin a pawt sei thei dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.



GPU

Computer khawl pawimawh Graphic Processing Unit (GPU) chu ramchhungah ngei kum 3 atanga kum 4 chhungin siam a ni dawn. New Delhi-a AI chungchang inhmuhkhawmah Union Electronic and IT Minister Ashwini Vaishnaw chuan he thu hi sawiin ramchhunga siam GPU chu khawvela man tlawm ber a ni ang tih a sawi. Pu Vaishnaw chuan sawrkarin GPU siamnaah hian subsidy zaa 40 a pe dawn tih a sawi bawk a ni.

Pu Vaishnaw chuan nikum khan India AI Mission chu sawrkarin a pawm tawh tih sawiin hemi hnu hian Artificial Intelligence lamah ram hlawhtlinna tam tak a nei tawh tih sawiin kum nga a liam leh chuan India chua technology pawimawh Semiconductor, AI leh Telecom lamahte khawvela a sang panga zingah a tel tawh ang tih a sawi bawk a ni



WOMEN’S DAY

International Women's Day chu naktukah ropui taka lawm a ni dawn. Hmeichhiaten ramchhung leh pawna an hnathawh ropui tak tak inhrilhthar ni atan International Women's Day hi hman thin a ni a. Kumin International Women's Day 2025 ah hian thupui atan Hmeichhiate tana dikna chanvo, intluktlanna leh chawikanna tih chu hman a ni a. Tumah hmaih awm lova chanvo inang, theihna leh remchanna pe tur leh hmabak tha tak nei tura hmalak chu kuminah hian uar taka inzirtir a ni ang. Prime Minister Narendra Modia pawhin NaMo App Open Forum kaltalngin hmeichiate chu an zinkawng ngaihnaawm tak tak te rawn pholang turin a sawm a. Hmeichhe thlan bikten International Women's Day ah hian a social media account-te chu an enkawl dawn tih sawiin an ngaihdan leh vei zawng te sawichhuah nan an hmang thei ang a ti bawk.



INTNL WOMENS DAY

Khawvel huap Hmeichhiate Ni (International Women’s Day) leh BBBP Kum 10 tlin lawmna pualin nimin khan Mamit ah Dist Bawrhsap Pu K Laltlawmlova hovin hman a ni a.

Pu K Laltlawmlova chuan sawrkarin a tum leh ram hmasawnna atan a ngaihpaawimawh berte zinga mi chu hmeichhia te dawmkan a ni a, Sawrkar laipui atang a scheme tam tak hi hmeichhiate hamthatna atan siam a ni a ti a.

Bawrhsap chuan Mizo te vanneihna chu hmeichhia leh mipa te dinhmun inthlauhna tam lo chu a ni a ti a, Sawrkar hna emaw sumdawn lamah nise hmeichhia te hi an chungnung zawk thu sawiin inchhung enkawl leh chhungkaw enkawlna a an thawhna chu enhmaih chi a nih loh thu a sawi. Niti Aayog in a hmeichhia te hamthatna atan a hma a lakna Women Entrepreneur Platform(WEP) a in register ngei turin District Bawrhsap chuan a chah a, hmasawna a neihna atan a pawimawh thu a sawi bawk.

Lawngtlaiah pawh nimin khan District Hub for Empowerment of Women (DHEW) Under Mission Shakti, DPO (WCD) Office, leh Cultural Committee, Government Lawngtlai College tangkawp buatsaihin 'International Women's Day 2025' lawmna Government Lawngtlai College - ah neih a ni.

Specialist Financial Literacy (DHEW) D.P.O, Pu Z. Laldinhuala chuan India ram baka Mizoram Hmeichhiaten ram leh hnam tana an thawh nasat zia te, Hmeichhiate dinhmun chawisang tura hmalakna hrang hrang, Mipa leh hmeichhiate intluktlanna, Zirna, eizawna leh infiamna kawnga hmeichhiaten hlawhtlinna an neih te bakah Danin hmeichhiate a humhalh dan kawng hrang hrangte zirho a ni.

'International Women's Day' hmannaah hian Pi A. Lalawmpuii, Thingkah, Rickshaw hmanga eizawng mek, Mizorama hmeichhe Auto Rickshaw Driver hmasa ber hnenah chawimawina 'Memento' hlan a ni a.

International Women's Day- hi kum tin March ni -8 ah thupui thlan bik neia hman thin a ni a, kumin bikah chuan Inrinni a nih avangin nimin khan hman a ni. Tun kum thupui atan hian "Accelerate Action" tih hman a ni.

<><><>

TRIBAL

Union Minister of State for Home Affairs Nityanand Rai chuan nimin khan New Delhi-ah tribal thalai hruaitu 200 chuangte a kawm. Unoin Minister leh Tribal thalai hruaitute hi Tribal Youth Exchange Programme ah hun hmang hoin Chhatisgarh leh Odisha-a tribal district atangin an hruaitute an tel a. Pu Rai-a chuan Left-Wing Extremism-in a tihbuaina hmun engemawzatah hmasawna hna thawh mek thu a sawi a. Tribal thalai hruaitute chu kum 2047 a ram changkanga India siamna kawngah theihtawp chhuah ve turin a sawm bawk a ni.

<><><>